

四庫全書

史部

欽定四庫全書

史部

貴州通志卷二十四

詳校官監察御史

臣徐如澍

刑部郎中

臣

許兆椿覆勘

總校官編修

臣

倉聖脉

校對官庶吉士

臣

潘庭筠

謄錄監生

臣

周元梓

欽定四庫全書

貴州通志卷二十四

武備

師旅考

國朝

順治四年春正月流寇孫可望等陷遵義明末流
寇猖獗張獻忠據蜀僭號以延安人孫可望為軍
師已而疑之乃改為平東將軍而以李定國為安

西將軍劉文秀為撫南將軍艾能奇為定北將軍
陰制之獻忠戮蜀人幾盡次及其兵將可望等懼
值肅王至保寧獻忠中流矢死遂率衆奔貴州破
遵義入據貴陽城官民避去賊四路搜捕箐洞殺
掠無算平威龍新之間千里蕭然無雞犬聲○二
月攻定番州城屠之按察使張耀叅議曾並都勻
知府陳瑞同士民死守盡遇害○三月我

大清兵西征至遵義可望聞風屠貴陽城遁去留偽

總兵栢永馥巡道董顯忠守之旋大軍引還保寧
可望遂圍鎮寧州叅議武右文率衆據守城破被
屠並屠安南普安等城遂入滇故明總兵羅聯芳
與前撫范鏞復據貴陽城時黔省未頌正朔苗蠻
蠢動諸擅兵相攻者蹂躪地方無有寧日○四月
苗賊藍二糾衆反攻陷甕安黃平復圍平越府故
明總兵張才擊走之旋就擒戮於市○十月綦江
人王祥率兵數萬據遵義

五年七月王祥與皮熊

即羅聯芳

構兵相攻圍貴陽城

八月平茶司人楊光謙等敗王祥兵貴陽圍解○

十月皮熊遣兵攻王祥次烏江為祥所敗全軍覆沒○十二月皮熊及王祥平

六年正月故明總兵張先壁擁兵由楚入黔至偏橋皮熊遣楊光謙敗之○八月孫可望與皮熊等以通好為詞遣其前鋒白文選取安順府攻青崖白納燕樓等箐硿破之旋撤去先是明桂王子由

柳自立於肇慶稱號永厯至是封皮熊匡國公王
祥忠國公使守貴州

七年四月白文選襲貴陽入之李定國至自滇與
皮熊范鑛等盟而去○八月孫可望由雲南襲據
貴陽皮熊走清浪追執之奪其兵又攻遵義王祥
兵敗自刎死

十四年八月孫可望降可望自據貴陽八年遣雲
南僉事楊畏知謁由柳請封為秦王設行宮官屬

及府州縣衛所等官遣營官臨田徵租以十之三
給民九年可望迎由榔於桂林置之安籠所改曰
安籠府相待無人臣禮偽知府范應旭至書其支
糧簿籍皇帝一名后妃數口月支糧若干十年由
榔聞李定國與可望有隙使內監張福祿全為國
諭定國以兵來迎馬吉祥私告可望十一年春可
望使鄭國王愛至安籠殺福祿為國與張鐫等十
八人十二年可望遣兵犯常德敗歸十三年李定

國敗於新會將由安籠走滇可望偵知之促由榔
移黔由榔故遲行定國至遂奉由榔由安南衛走
雲南至是可望率兵向雲南與定國戰於交水會
白文選馬進忠內變大敗還劉文秀率兵追至貴
陽可望遂走長沙來降

十五年二月宗室寧南靖寇大將軍都統羅託經
畧洪承疇率師取貴州三月至沅州賊遁四月入
貴陽五月都統侯李復遵義八月李定國遣兵寇

城下擊却之又遣兵襲青崖城敗去九月安遠靖
寇大將軍信郡王鐸尼率師至黔次偏橋時巡撫
趙廷臣亦至即於行營受印視事十月會師取雲
南三路並進十一月信郡王發自貴陽李定國扼
雞公背圖侵貴州遣別賊將守七星關抵生界立
營窺遵義以牽蜀師十二月王師出遵義由水
西取烏撒賊將棄七星關走霑益王師入安籠
連敗李定國於安籠之羅炎涼水井撒寨定國遁

歸雲南

十六年三月宗室寧南靖寇大將軍羅託班師旋京○閏三月偽總兵官馮天裕等聚衆攻陷湄潭劫掠平越思南等處總兵官胡茂正李本深等會川兵剿平之○夏四月偽將軍楊光謙降安置貴陽○施秉縣苗亂殺知縣趙玉奇

十七年正月安遠靖寇大將軍信郡王鐸尼班師還京○四月馬乃營土目龍吉兆等反雲貴既平

各土司俱奉貢賦遵約束有普安州所屬馬乃營
土目龍吉兆者與安南衛屯軍王回子田界相連
互相侵奪積為仇讐吉兆因收養亡命私造軍器
奸民文元胡世昌況榮還黑把事謝把事毛把事
等俱黨附之遙結李定國為聲援糾合鼠場營龍
吉佐樓下營龍吉祥軟血盟掠廣西泗城州之土
寨安南衛之阿計屯水橋麻衣冲下三阿白屯等
處所過劫戮民人竄逃總督趙廷臣巡撫卞三元

再四招諭負固不服乃合疏請討之○六月偽寧國侯王友進降○黎平曹滴司土官楊華如招納亡命陳洪金等謀亂黎靖兵討平之○九月擒叛賊呂洪易等誅之洪易順天人自海賊鄭成功處轉入黔省竄伏水西隴革地方招逆黨權時泰賀鼎等自稱興國公謀取貴陽為水西宣慰安坤發其奸擒洪易斃於獄餘黨伏誅○十一月總督趙廷臣進討馬乃十九日破果毋寨殺賊數千擒吉

兆子吉佐妻殲逆黨文元胡世昌於陣遂乘勝破
叶呬寨吉兆閉寨拒守官兵圍之

十八年二月總督趙廷臣令官兵人持一炬縱火
焚其寨破之龍吉兆及逆黨況榮還等皆伏誅焉
乃平○三月分駐大兵肅章京杜爾德等班師還
京○九月逆賊劉鼎叛圍定番州提督李本深擊
走之

康熙元年八月黎平歸弓寨苗亂提督李本深討

平之

二年正月丹平土官莫之廉以隱匿劉鼎伏誅金
筑土官王應兆與劉鼎通總督楊茂勲討平之鼎
敗逃水西七月被獲伏誅○十二月廣西夷阿仲
反僭稱永龍元年盤據廣西隴納山出犯普坪安
龍等處安順總兵官張鵬程討平之

三年正月逆賊常金印等謀反伏誅金印上元人
自稱常遇春之後從粵走黔與水西安坤皮熊等

同謀反金印稱蕩虜大將軍湘平伯偽造印勅旗
纛聚黨陳鳳麟高岑吉士英米應貴等煽誘諸土
司為亂為同黨陳大出首俱就擒○二月水西宣
慰司安坤叛

上命總管吳三桂督雲貴各鎮兵分東西兩路討之○
三月朔三桂統雲南十鎮兵由畢節七星關入果
勇令總兵劉之復駐兵大方遏其衝逸令提督李
本深統貴州四鎮兵由大方之六歸河會剿而

屯糧於三岔河首尾夾攻布置既定而檄黔省兵
書誤書六歸為陸廣於是本深兵及黔蜀二省所
運之糧盡屯陸廣三路氣息隔絕不相通三桂受
困兩月食將絕外援不至永順總兵劉安邦戰死
受圍益迫適水西土目安如鼎遣人偵黔營虛實
為本深所獲始知三桂被圍已久乃使為引導整
兵入援副將白世彥手斬驍賊以罵於陣賊遂敗
走總兵李如碧亦率精兵入重圍運糧接濟兵始

合為一敗賊阿作崗復敗之得初崗九月又敗之
紅崖崗坤率其妻祿氏逃於木弄箐復逃至烏蒙
烏蒙不納坤遣漢把魯經賫印投降不許生擒坤
於大方之杓箐並擒賊黨皮熊安重聖等熊不食
十五日而死坤與重聖俱伏誅

四年十二月卽岱土司隴安藩反命吳三桂發兵
討之藩乃安坤親黨坤滅後招納坤餘黨隴勝等
及安重聖妻隴氏殺安順府經歷袁績攻破關嶺

直犯永寧隴勝等亦攻犯大定威寧殺畢節衛經
歷秦文

五年五月平遠兵變尋撫定之○六月隴安藩等
伏誅郎岱平○十二月湖廣通道縣苗吳老潘僭
稱王號煽惑黎平府屬黑崗口等處各苗造亂尋
討平之○烏撒隴氏叛伏誅

八年正月黎平田心等寨苗亂鎮遠副將石玉貴
等合兵討平之○十一月定番苗阿戎等亂尋討

平之

九年六月鎮遠府屬那磨等三十六寨逆苗降

十年春正月扯處烏夷目俄凹阿蠟等降

十一年春正月凱里苗亂尋撫定之

十二年春二月廣順州苗變殺吏目蔣士璘○都

勻苗亂殺天壩司長官天應祿○冬十二月吳三

桂反於雲南提督李本深以貴州應賊總督甘文

焜死之二十八日吳三桂陷貴陽

十七年七月吳三桂死於衡州

十九年十一月大兵復貴州先是逆黨郭壯圖因
三桂死擁其孫世璠屯貴州以拒大兵及是定遠
平寇大將軍固山貝子章泰統征南將軍穆占各
旗正副都統喇賽薩克查巴圖魯釋伽保陝納海
莽吉祿陶代宜思孝官保內閣學士薩海總督盧
崇峻蔡毓榮董衛國將軍林興珠提督趙賴周卜
世等滿漢官兵由湖廣克辰龍關取鎮遠清平破

偽將軍韓天福於平越世璠遁回雲南

二十年正月大兵克盤江吳世璠遣偽將軍線絨
屯兵江西坡扼險以待大將軍章泰大敗之賊兵
分據黃草壩征南大將軍賴塔統各旗正副都統
勒貝希福馬齊趙連額黑里花色紅實錄祖植椿
總督金光祖將軍馬九玉滿漢官兵由泗城州奪
石門坎拔安籠所繞出賊後大破之

二十一年三月定遠大將軍章泰征南大將軍賴

塔及正副都統穆占希福莽吉祿喇賽孫他劉顯
忠等先後奏凱

詔移逆屬家口及偽將軍總兵副將等進京叅遊以下
俱發河南江西山東湖廣四省安置民間起夫運
送自二十一年起至二十七年始止

二十四年七月黎平賊何新瑞反新瑞本李姓初
在靖州為僧後至平茶所犯罪逃至新化乃冒姓
何稱故明總督何騰蛟子煽惑苗民作亂黎平官

兵擊敗之○十月夷目王騰龍王成龍謀叛擒斬之

二十五年二月何新瑞伏誅徙土司韋有能等以其地入永從縣

三十年十二月黎平府高洞苗金倒大倉晚掛補哄等刦殺行旅知府張湫遣吏目劉淳往緝之副將侯奇遣兵同往苗以為剿已也遂殺淳及官兵二十餘人合十數寨俱反

三十一年二月巡撫衛既齊遣官諭撫不從因會
題請剿官兵至首惡就擒古州車寨等處亦次第就
撫既齊劾張湊侯奇激變之罪

命吏部尚書庫勒納內閣學士溫保會同雲貴總督范承
勲勘問晚掛補哄等伏誅侯奇張湊並論斬

三十八年都勻白苗甲多等寨作亂叅將張應金
剿平之

四十年十月黃平革夷苗奴計羅尤等拒捕傷凱

里都司胡安國殺土官何瓚遠巡撫王燕遣兵剿之奴計等伏誅

四十二年十月銅仁鎮草紅苗亂提督李芳述討平之

四十三年冬黎平苗黃明謀叛尋擒獲伏誅

四十六年八月普安州三江獍苗不法安籠鎮總兵李得勝督兵剿平之普安苗明初設土司羈縻之弘治時夷婦米魯叛經年始平至是有三江獍

苗黃柱漢殺菴章寨黃國一家七人又仇殺紅車
凹洞阿里擄其人畜總督貝和諾委官擒治抗拒
不出因與撫臣合疏請剿仍令安順府知府許天
馥副將李雄招諭之止下江苗寨奉命餘皆負固
得勝率叅將王應龍遊擊洪容魯岱分兵布上中
下三江調雲南副將高文成平遠副將駱儼廣西
守備劉鳳鳴李霖等為犄角○十一月四日李雄
兵抵隴戛苗以數千人據險誘我兵進擊而伏賊

數百於四坡把總林鳳翔奮擊伏賊皆披靡奪中
江要隘駱儼由叢箐進取法崖寨其寨高十五里
懸崖陡絕甫上半坡苗數百鏢弩迎敵我兵擊却
之遂破其寨高文成亦率兵由乃革渡河直搗這
都這那復分路夾攻挖者勒洛籠空崖諸寨苗俱
竄上獨石壘其壘千尋絕險叢箐無路難以仰攻
乃絕其水道數日賊窮蹙始將渠克抱應抱省等
縛獻軍前自是不敢復出侵犯

五十年三月蔡江洞苗老吳大田等作亂先是提督王文雄

題改黎平頂洞汛移駐蔡江名為西山營洞苗恣占其地乃自毀房屋以示不服至是因催辦木料騷擾苗寨老吳等遂殺兵役圍其營鎮遠遊擊王國印救却之繼遣千總馬似龍諭降誘擒首惡伏誅西山營守備官亦坐革職裁其營

五十四年四川烏蒙土府祿鼎乾與貴州威寧屬

土目祿世華因爭稻田壩之地劫擄世華人民牲畜川撫委員往勘鼎乾負固不出川撫年羹堯欲剿之黔撫劉蔭樞持不可乃遣都統阿爾納副都統吳坤侍郎噶敏圖會同雲貴川三省督撫於畢節縣勘審鼎乾懼請釋仇和解歸所掠人畜及侵地

雍正二年冬討定廣仲苗平之黔苗種類仲家最為兇頑在定番廣順間者尤甚明時旋剿旋叛後

用鵬剿法稍知畏戢仍時出刼掠漢夷男女售與漢奸轉販他省以獲重利居民苦之有阿近者勾結羣苗據散幹山寨自稱為苗王總督高其倬會同撫臣毛文銓提臣趙坤調兵往剿擒獲阿近暨其弟阿卧斬之

四年四月討長寨仲苗平之廣順州長寨地方內接安順府屬之十三枝普定縣屬之五枝外通粵西撞獠實為盜藪阿近阿卧誅後總督高其倬遂

請於散幹西孟等處添設營汛控其險要會其倬
調任去總督鄂爾泰繼至勅修建營房而餘黨阿
搗阿撈等聚衆抗拒旋建旋焚爾泰遣定廣副將
劉業浚進剿怯不敢前乃以都勻叅將劉朝貴代
之朝貴至今遊擊官祿攻谷隆關卜萬年攻者貢
等寨破其巢穴擒獲甚衆餘黨畏懼獻首惡阿搗
阿撈併漢奸李奇等俱伏誅遂定兵制設長寨營
併移貴陽府同知分駐其地

五年三月剿謬冲苗平之黎平府屬有花苗一種
介黔楚之交喜鬪好殺獷悍難馴而謬冲寨三面
削壁路通一線諸苗恃此為險不務耕業專以刦
掠為生至是總督鄂爾泰提督楊天縱會湖廣總
督邁柱遣兵進剿斃其渠魁陸太還餘皆奔潰黎
平府知府張廣泗鎮遠遊擊韓勲率知縣孫紹武
守備左垣等鼓勇先登衆隨猿攀而上直破其寨
擒斬無算有芋河溪寨者素與謬冲為聲援乘勢

並剪滅之其黨歸歐鬼壘九厥交椅几馬等寨皆
聞風震懾詣行營繳器械願納糧賦乃視地之遠
近分隸黔粵兩省○七月總督鄂爾泰請改廣西
泗城土府歸流分其地設永豐州隸貴州廣西泗
城土府延袤二千餘里其地北與黔省普安南籠
永寧定番相錯夷獯雜處仇殺時聞兼以山高地
險奸民犯法者藉為淵藪爾泰洞悉其害適泗城
之者相與普安之者坎互爭地界黔粵俱委官會

勘泗城土知府岑應宸帶土兵三千餘人亦至者
相爾泰疏列其罪革其世職改土歸流安置應宸
於浙江以紅水一江天限黔粵乃割江以北地泗
城之長壩桑郎羅斛等十六甲並西隆州之羅煩
冊亨等四甲半零二十一寨歸貴州南北約三百
里東西約七百里請建永豐州於長壩設知州焉
八月總督鄂爾泰委黎平知府張廣泗會同副將
李登科往古州相機招撫生苗

六年三月廣西西隆州八達寨土目顏光色等不法安籠鎮官兵協剿平之○十月巡撫張廣泗討八寨生苗平之八寨為都勻要隘丹江清江古州之咽喉窟穴其中者為黑苗往者半隸天壩土司自將土司戕害後雖改屬都勻府而流土俱不受制與化外無殊楊排楊堯也告楊烏四大寨恃強恣肆附近諸小寨皆為役使又番仰番扛擺卓等十餘寨與丹江諸生苗勾結剽掠其地既為苗疆

之肯綮其苗又屬梗化之渠魁欲靖苗疆宜從八寨始正月總督鄂爾泰謂生苗不亟加懲治匪獨為苗害且大為民害既審地勢察苗情詳悉具

奏荷蒙

聖鑒指示周詳調貴州按察使張廣泗赴滇授以剿撫機宜五月十六日廣泗由貴陽率兵赴都勻六月初九日同都勻營叅將趙文英等營於八寨隘口仰體

皇仁不遽加兵張示開導冀其悔悟有代理代省九門長
塘等四十餘寨詣營就撫而楊排楊堯等寨拒抗
如故且脅數寨為援然苗素未經大敵不過凌轢
單弱十二日文英督兵攻擊交鋒未逾時即奔竄
次日有被脅之牌牙壩固等賊及大肚小肚等十
餘寨咸相率投誠時獨山汎漢土官兵自普坐奉
調赴八寨途經交歸羊甲等寨曾與楊排楊堯糾
結不知二寨敗猶競出堵截官兵鼓勇連破六寨

於是附近交歸之甲些等十餘寨皆來降十七日
移營斗魁斗魁者八寨適中扼要地也當是時軍
威初震數十里內之山洞生苗紛紛歸附惟番仰
番抗拒命十八日廣泗密飭撫標守備張瑤麻哈
州知州孫葵將兵分攻趙文英據要策應苗亦分
路拒敵官兵奮擊擒斬追焚巢穴於是番仰番扛
暨楊排楊堯等寨諸賊皆逃匿亦有畏威乞撫者
七月廣泗移兵開丹江總督飭以兵雖屢勝而地

險苗衆未可玩視緩急進退務籌萬全廣泗乃於二十四日率兵下丹江賊千餘阻去路擊走之二十六日抵梧桐隘口賊瀰漫山谷擊之則四竄林莽少頃復聚是時都司羅資袞奉調由凱里進丹江亦為苗所阻乃改途由囊孟走烏壘鏖戰九日始達廣泗營適總督密飭至以丹江逆苗雖屢經挫衄而毫不畏縮倘勾結八寨以襲我後則糧運必不繼戒勿輕進於是廣泗等移營甕城以其地

扼八寨之吭而拊丹江之背也而八寨已附之苗
果為丹江苗煽誘復叛廣泗請益兵八月總督調
左營守備徐希達把總楊漢飛提標遊擊田昌友
貴陽遊擊史應貴守備任龍等各領兵赴軍前而
統以定廣協副將蘇大有又造靖蠻大砲送行營
飭廣泗等以羣苗負險狡詐莫測天時可乘地利
宜審近功速效亦非遠圖凡事知難斯易視易轉
難務須慎重是月廣泗奉

命巡撫貴州總督復以機宜咨授謂八寨與丹江聲勢相倚而丹江在內八寨在外非大創八寨使其弭耳帖尾恐苗情反覆無常欲進丹江輒為所阻即不然而我兵已入丹江兩地逆苗更番擾我益滋掣肘廣泗乃於九月二十六日先進剿甲些烏歸等附賊之三十餘寨十月初四日訶得丹江苗賊來助逆伏兵待之初五日苗果蜂擁而至猝遇伏兵驚潰官兵追擊遂破附近也告之大小八寨又

乘勝焚首惡之楊排楊堯楊烏附惡之也條楊列
者良等數十寨是日蘇大有率兵分剿偵知前路
有賊令官兵分左右潛伏少頃見苗數千來俟其
過半截擊之苗首尾不能相顧把總高選等由左
路逐殺燬擺楷也畧壞頂壩構四寨大有率守備
傅又新等由右路逐至也告關口手斬逆苗無算
會文英兵亦至遂焚也告三大寨各寨苗皆震聳
數日內楊亭番仰黨找達石硿夾排戛等數十寨

各刻木輸誠廣泗示諭除首惡不宥外餘許就撫
八寨既平議進丹江留文英鎮守知縣魯朝聘招
撫附近生苗其極遠之千家寨俱後先歸化隨建
城設官隸都勻府

十二月巡撫張廣泗討丹江生苗平之丹江與八
寨密邇而清江古州諸地界亦牙交繡錯生苗聲
氣相通盤踞其中者為桃繞等四十餘寨名大丹
江右有烏壘等二十餘寨為藩籬名小丹江左有

雞講等十餘寨切近九股克惡尤甚又大小丹江
所恃以濟惡之區也十月八寨既平總督鄂爾泰
咨巡撫張廣泗於十一月十一日率兵進取丹江
相度形勢烏耶為大小丹江要隘抱得亦大丹江
出沒之區烏騷則延屬雞講乃調副將蘇大有由
八寨九門歷枯桐寨直取小丹江令副將張禹謨
由烏溜進攻抱得期會於大丹江並分兵屯烏騷
山岡以牽制雞講廣泗率遊擊田昌友史應貴都

司羅資袞等駐兵烏耶坡以扼要隘十二日大有
自八寨出烏高抵枯桐兵威初張群苗紛紛竄匿
官兵沿途搜剿十五日越枯桐抵石板寨苗數千
阻扼大有以重兵伏叢薄而率輕兵誘擊之苗潰
敗次日大有分兵四伏獨登相近烏疊之山岡覘
賊虛實彌望深林灌莽間若無人突聞四山震動
賊擁如蜂伏兵起賊大敗隕首洞脅者纍纍填澗
壑二十日趨小丹江賊於頭關土城密佈銃砲以

拒大有直逼城下奮勇先登手刃賊四十五人連
破土城五座追至小丹江燬其巢穴移營駐烏疊
寨由是大有為諸苗所深畏雖婦人小子聞其名
無不咋舌是月十三日昌友等分兵奪烏耶左右
山岡進劄頭關口禹謨亦奪烏溜寨進攻抱得焚
三寨時烏耶關口苗四路來寇昌友連日攻擊旋
敗旋聚相持未下以故禹謨雖破抱得懼賊襲其
後不敢進廣泗聞之輕騎赴抱得營令羅資袞出

左路守備梅先春出右路夾攻囊猛賊奔散火其寨囊猛者大丹江綰轂處也此寨既平可以直走大丹江乃令禹謨馳赴烏耶助昌友而自領其衆二十四日廣泗遂移營於小丹江賊糾衆數千乘官兵初至肆衝突叅將王惟一領定番土兵擊敗之賊乃遁十二月初三日大有進攻大丹江黃茅嶺破之楊排等八寨刻木來降昌友應貴等分攻固猱計籠等六寨悉燬之初五日官兵分三路攻

破桃繞於時諸苗震恐皆赴大營乞撫惟抵箇難
講等寨堅守不出而大小丹江之苗剿撫歸附者
十已七八初十日廣泗令昌友應貴等率兵直趨
抵箇又令安南營兵據其寨左之高嶺苗數千競
出皆殊死鬪官兵併力夾擊大破之窮追至難講
山後次日禹謨兵亦至苗仍聚衆合戰官兵合擊
之披靡奔潰棄刀鎗火銃攬牌諸器械山徑為之
阻塞官兵焚難講等五寨是時衆苗竄伏山箐無

所得食相繼赴大營匍匐乞憐旬日之間次第就撫遂編其戶口留兵鎮之明年丹江鬼師老楊老水等煽衆復叛襲大丹江營時總督坐鎮貴陽命叅將官祿剿之不克復檄總兵哈元生將兵協剿賊敗遁尋獲老楊等梟示餘黨乃平乃建城設官亦隸都勻府

七年六月巡撫張廣泗討清江叛苗平之清江亦黑苗境也以上下九股為門戶丹江八寨為藩籬

與施秉舊縣接壤明時結連播州楊應龍為寇肆
焚掠因遷施秉縣治於偏橋以避之順治十六年
殺縣令趙玉奇鎮遠黃平居民悉遭蹂躪厥後稍
斂戢而時剽掠行旅以故清江上通重安以達都
勻下通黔陽以會朗水舟楫往來雖較潯溪為便
而估客帆檣不至焉春總督鄂爾泰駐貴陽以八
寨丹江既平檄鎮遠知府方顯招撫九股次及清
江又令副將張禹謨領官兵彈制之於是顯等親

歷諸寨宣布

皇威下九股諸寨不煩兵威相繼就撫上九股向恃難講為援及難講等寨既已芟夷亦相率就撫小江橫坡等處咸望風歸附顯等次第稽其村落戶口而編管焉及抵清江柳羅柳受等寨爭先降附願為良民惟江外有公鵝苗與柳利雞擺尾雞呼黨白汗白索等十餘寨素相連結復有漢奸從而啖之曰若歸漢官彼且重賦繁役以魚肉若不如結

黨固守官兵設與相持則彼饑若飽彼勞若逸可
以坐困即相攻併死力以禦亦可圖存於是探禹
謨甫駐兵柳羅即渡江攻刦官兵勢甚猖獗總督
聞警調各路兵從巡撫張廣泗進剿兼示機宜以
公鵝等寨逼處清水江宜及時剿滅彼所恃以抗
拒官兵者江深崖險耳急之則併力死守當緩以
誘之俟其防虞稍疎潛師渡江上下夾擊一鼓成
擒矣是時農務方急大兵既至柳羅賊詭言願受

招撫為緩兵計廣泗佯許之傳諭行營曰安撫諸寨訖即撤大兵賊防守果懈五月十四日方顯邏知江邊有小舟白廣泗選健卒夜半奪之僅十餘隻柳受苗素恭順潛駕舟四十濟師師全濟廣泗乃分兵八百屬遊擊母椿齡斷苗右臂以絕外援又分兵五百屬守備徐希達伏林以截逋竄而自領大兵直搗其寨賊措手不及殺傷無算遂進據其寨苗用兵無他能惟以昏夜剗營為奇計次日

廣泗策其必來薄暮令衆兵伏要隘而空大營以待二鼓苗果銜枚逼大營咆哮而入寂無所遇急反走不數武四面砲聲震地火光燭天官兵前後夾擊苗互相擠墮死者無算十六日董兇寨暨附逆之柳利雞擺尾諸大寨咸赴營受撫並縛漢奸曾文登以獻六月初五日公鵠諸逸賊窮蹙悔罪願受約束時廣泗有古州之役留大有方顯同駐清江經理諸務十一月初六日雞呼黨東庫白汗

白索諸寨復聚衆刦營官軍偵知嚴兵待之抵夜賊萬餘分四路夾攻大有當先奮擊賊奔潰官兵分路追殺總督聞之復調大定協兵赴清江諭令殄盡根株而大有與顯等誘擒渠魁獎率將士戮力攘除賊乃埽要道闊丈餘參差樹大櫪又掘阱覆茅葦於上以拒官軍二十二日大有令劉成龍章奇相韓生耀皮袞任龍分兵三路而身先士卒拔櫪填阱以擣賊巢縱火燎其居賊大潰東庫大

臘黨泥白汗黨苗四山號泣皆稱為雞呼黨迫脅
願擒克首繳器械以就撫由是清江諸苗寨悉平
以公鵝寨據清江形勝就其地建城設官隸鎮遠
府

九年七月古州上下江逆苗悉平古州地方遼闊
形勢險峻苗種繁衍叛服靡常自漢迄宋羈縻而
已元至正中設古州八萬軍民總管府明洪武間
以外古州設潭溪龍里洪州八舟歐陽新化亮寨

中林曹滴西山湖耳赤溪古州永從等十四司而
裏古州棄之化外我

朝定鼎後逆賊吳三桂偽將馬寶兵敗於楚取道古
州以竄滇諸苗遮獲其大砲火銃盔甲而內地作
奸犯科之徒教以施放之法並為購鐵增器械製
火藥於是諸苗日事讐殺官司不能禁又往往窺
伺內地劫奪網擄六年總督鄂爾泰奏

聞欽遵

廟謨由凱里進兵先其近而易者於是八寨丹江清江等處以次平定巡撫張廣泗前守黎平時有謬冲之役於古州苗情地利頗得梗概七年二月總督自雲南來駐貴陽居中調度咨廣泗開古州六月十五日廣泗由清水江統兵至岑龍坡取道黎平府以進而古州羣苗勾結岑梗梅得二寨及附近山苗萬餘人拒命廣泗令黎平協副將趙文英遊擊周豹攻二寨破之隨令黎平知府張鉞平越營

遊擊向之榮貴陽營遊擊史應貴各領漢土兵護糧芻進屯岑隴古州故分上中下三堡諸葛營在三堡之中是時諸苗叛形未露咸予招撫值科場屆期廣泗將回貴陽監試乃命文英鉞等統兵駐古州之諸葛營以鎮撫之十二月都江上遊之來牛定旦叛文英請益兵禦之二寨地廣人衆性尤兇悍兼煽動革招革雄搖排搖晒擺調方勝等數十寨相與梗塞河道文英遣土舍林天錦吳和禧

前往招撫和禧為所殺總督鄂爾泰摺

奏謂都江一水在古州諸葛營之南由諸葛營而西
為上江來自黔之都勻由諸葛營而東為下江直
達廣西之柳慶沿江山硎諸苗多未歸附非用粵
兵協勦難以開通乃調廣西慶遠協副將潘紹周
永寧營叅將施善元各統兵由沈口至古州以慶
遠知府徐嘉賓監紀軍務會趙文英溯都江而上
剿諸蠻疏通河道又飭都勻協副將卜萬年獨山

州知州孫紹武領兵由三角堡直取來牛以距上
遊又調桂林協副將董芳領兵由荔波縣三洞至
平宇與文英等相聲援八年正月紹周善元先後
抵諸葛營同文英於二十一日往攻定旦兼程而
進直據定旦後山賊鳴鼓聚衆競放銃砲我師擊
敗之奪其大砲銅鼓鐵甲燬其巢定旦既平來牛
諸苗皆竄入林谷自都江至平宇沿河四十餘寨
無不危懼羊邦羊翁十餘寨去定旦甚遠亦來歸

附惟八飛隴寨雖附近行營兩岸陽順陰違狡黠特甚督撫檄催萬年董芳紹武守備馬允升合兵進剿二月十四日萬年等抵隴寨前山賊蟻屯兩岸狂呼大噪直犯大營萬年等以官兵為正土兵為奇張五路以分賊勢自寅至未砲斃數十人賊始退保隴寨萬年等督兵進攻奪賊船以渡直逼寨門銃砲齊發苗不能支從後山遁遂破其寨二十一日移師進八飛賊伏莽以伺官兵追逐斬首

數級餘皆鼠竄於是布養豐柳擺勞等寨咸願納糧應役而來牛搖排搖晒革招革雄諸寨餘孽散而復聚猶截河道以拒官兵且期於是月二十五日併力攻大營萬年等偵知之預令千總楊剛等以兵七百伏來牛南岸上流張唯等以兵七百伏南岸下流誡之曰聞砲而動翌日辰刻賊果蟻聚北岸喊聲震山谷萬年率守備殷起龍馬允升由南岸迤邐前進日午苗見官兵無後應遂渡河衝

突俄而砲聲動地官兵三路齊發賊倉皇不知所
為俘斬與溺死者不可數計遂移營平定山議剿
革招老你等寨而文英善元亦自定旦來會次日
萬年等領兵二千餘分道並進山高箐險革招苗
營窟其中不虞大軍遽至及我軍攀藤披棘齊逼
寨門苗乃大驚空寨逃匿官兵分道搜剿焚其巢
附近之俾爽柳疊平甲排告諸寨咸刻木乞降三
月初七日攻老你寨破之搖排搖晒諸苗懼相率

詣營門乞撫怎冷有厄撤高等十數寨亦聞風歸
順二十一日師集來牛凡要害處分兵彈壓萬年
紹武防來牛遊擊周豹防定旦守備高本陽防寨
北守備張鳳翥防八開遊擊徐希達防都江而文
英紹周等率所部兵於五月初七日回古州議建
城於諸葛營是時古州之上中下三堡雖已就撫
而心懷觀望以為大師必撤彼仍得以自恣及聞
於諸葛營建城下堡之車寨苗最險謫距大營僅

隔一河中堡之口月寨頭藏弩數寨素稱兇悍為
山苗渠魁遂相與勾結倡亂龍早則殺通事黃永
吉寨頭則殺民人姚弘才苗光坡牛圈坡八孖諸
寨一時響應謀於十五夜焚劫大營利洞頭人靳
瑞林因把總徐祺生來告十四日文英等議進剿
時河水陡漲渡船僅二隻古州同知滕文炯集新
撫諸苗寨船六十餘覆以板纜以大絙夜半成浮
橋次日五鼓濟師善元率守備侯弘道張煥等趨

永鎮關為夾攻計文英紹周分兵直抵中堡攻口
月寨頭江墨等寨苗以河水阻隔懈於防守突聞
官兵至驚惶奔竄我兵焚其巢俘首惡而誅之餘
俱繳械受撫六月初七日文英紹周由右路擣龍
早善元應貴由左路攻黨祥兩路皆絕險熾賊又
伐大木阻截之我兵緣山間仄徑騰蹕而行窮搜
大索俘馘甚衆擒苗一名老憂則車寨前往助逆
者也十二日攻車寨是夜三更車寨防守之苗聞

繞寨馬蹄聲視之寂然如是者三及五鼓甫就寢而大兵至賊督亂恇怯自卯至巳斬首千餘級就縛者三千餘人搜獲子母大砲十三座火銃長桿刀弩皮鐵盔甲無算梟斬首惡餘皆釋而撫之自是三堡諸寨無不褫魄同知滕文炯因勢招撫者百餘寨而來牛定旦復叛先是二寨雖已安營駐兵而上江山苗無慮數十寨擺調方勝素克悍為諸苗雄長革招怎冷怎衣邱車有已有厄龍坡冷

硬烏泥雅灰等寨莫不聽其指蹤於是煽衆作逆
奪據柳疊隘口刦糧運謀犯新營柳疊隘口者上
江路之咽喉糧運郵遞所必經也萬年紹武得警
報飛檄各路官兵預備合剿並調八寨官兵暨爛
土普安土兵於二十九日齊集拉攬臺萬年領兵
直趨柳疊賊見官兵衆不敢出惟於柳疊北岸遙
施火銃官兵攀崖逐殺賊散走於是柳疊不失而
糧運復通七月總兵蘇大有自清江抵古州任時

文英紹周鉞嘉賓等先期往溶洞清理下江大有
飛調文英紹周等星馳上江策應而副將董芳亦
奉調至來牛遂同萬年等進兵堵剿初擺調方勝
倡逆時首附和以殺夫奪糧者革招也聽其脅制
不敢少抗者排怪有厄邱車諸寨也衆議先落其
角距不半月而諸寨可平乃於八月朔進剿擺調
文英以兵一千攻其左萬年以兵一千攻其右殺
賊數百人餘潛奔密箐乘勝直攻方勝張翼夾攻

殺百餘賊斃於銃砲者無數焚燬其大小四寨擺
保羊烏者距方勝三十里與擺調方勝狼狽相依
二寨餘孽悉逃於此恃山險箐深官兵不能至文
英萬年等分兵伐山通道直逼其寨賊併力奔突
官兵銃砲齊發僵屍橫地餘皆潰走追至加雅大
箐復斬馘數百俘二人於是黨我者飛甲石等七
寨苗民相率赴營求撫擺調等四寨逃竄逆苗亦
悔罪來降而是月二十三日龍坡冷硬等寨潛勾

定旦餘孽突攻新營為遊擊周豹擊散大有飛調
董芳帶兵會剿官兵既合於九月初二日先攻龍
坡冷硬由是而倂硬而恩堆而倂舉一路蕩平勢
如破竹弓桃雞髓等三十餘寨皆遮道受撫文英
萬年乘破擺調四寨之餘威於初八日由奪弄攻
雅灰雅灰故與定旦通恐官兵至坎其道路塞以
巨木文英萬年等踰岸越嶺直搗其寨賊逃匿一
空官兵四路搜捕隨有色彞色排羊長羊羔等十

餘寨暨阿黎阿墨撒高擺地等二十六寨相繼輸誠誓為良民是役也為時未匝兩月俘馘以千計向化者百餘寨獲賊仗不可數計二十八日撤師回古州去古州五十里許有苗寨曰滾宗計十有二寨陽示恭順陰懷叵測舊與車寨頡頏左右數十寨山苗咸憚其克敵近見中下二堡皆剿心不自安乃煽誘通倒高牙等寨並招納定旦龍坡亡命以自助肆行剽擄大有檄善元任龍統黔粵兵

分路進剿時文英等以上江之役未回大有慮頑
苗乘虛覬覦限善元等以三日旋師十月初八日
抵滾宗後山善元領兵由左路取火燒寨一路崎
嶇嶢确無尺寸坦途守備涂有功力攻前關賊死
守善元潛從山僻小徑陟後山之顛下擣其虛賊
首尾不能顧有功斬關而入殺苗數百焚其寨乘
勢破中南兩寨立燬之任龍由中路取領月寨累
歷深箐去領月咫尺逆苗壘石為關留小竇僅容

一人匍匐出入又用大木為柵多鑿小孔以架火
銃守禦嚴密千總周熹奮勇前攻一矢貫兩苗苗
膽落棄關守寨自辰至巳攻寨門不能破周熹瞋
目大呼守備侯弘道偕千總王嘉猷李梅得等協
力急攻苗始棄寨走黨補周熹追之中火銃死善
元督兵為後勁發火箭延燒苗屋須臾灰燼附近
之俾景與上寨下寨悉行剿滅殺苗百人銃砲斃
者倍之初十日善元等還古州適如三日之限而

滾宗十二寨已破其八是日文英紹周等亦至自
上江大有以滾宗雖經小創而克猾未改須草薙
禽獮之方議加兵而烏泥公台等寨與定旦逸賊
殺邏卒數十以叛官兵進剿不數日二寨皆滅時
大有病故以董芳署理十一月文英紹周各將兵
千餘進擊滾宗十七日抵其寨設伏待之賊犯大
營為伏兵擊走官兵逐北經喬扣養黨碑尾等數
寨俱縱火焚之賊遁入土壘大寨層壘土牆又嘯

聚俾賴加頭邦受高烏等數十寨堅壁自守官兵累攻不下芳調定旦兵千名領以守備殷起龍於十二月初八日由古州進援適總督遣員賚賞賚至營宣布

聖恩密示方畧將士倍鼓勵十九日分道進剿先以伏兵剪其外援然後文英率兵攻其前紹周率兵攻其後賊分兩路拒敵自辰至未賊兩路皆披靡遂破土壘由是滾宗十二寨咸懾兵威而俾賴加頭

數十寨亦相與剽營門願受編管文英等撤師
歸先是上江來牛邱車革招排常排怪柳排等寨
旋服旋叛時犯軍營是月十一日萬年遣馬允升
姚宅中沈弘謨等相機先剿後撫邱車等寨皆畏
服惟革招來牛排怪三寨負固至是年正月萬年
等分兵攻剿三寨賊遁匿深箐萬年焚排怪弘謨
破革招並獲其首惡阿屋解大營梟首時當春耕
衆苗因千家革雄布養三寨之苗哀懇就撫於是

革招等一百餘寨咸繳器械受約束四月上江邱
車寨復叛文英等率兵攻剿獲其渠魁阿桶斬之
又擒獲高孖定旦等寨附逆之阿種等十八人檻
致古州梟示於是來牛定旦等寨無不畏服而上
江一帶胥底定焉下江苗視上江為恭順獨滾塘
才瓦二寨頗頑梗復有加的寨同惡相濟同知滕
文炯親詣招撫不應六月董芳率文英紹周善元
等抵蘇洞危峯障日烏道懸樟文英等率領官兵

分路攀緣而上將近才瓦賊衆林立善元手刃二
苗官兵銃砲並發斃數十人砍死首惡老門等三
人始棄寨遁又分兵剿加的寨亦望風四竄時大
雨如注者數日有蘇洞苗民老巴者導內滾塘八
寨外滾塘二寨苗赴營求撫雨霽後發漢土官兵
搜剿逸賊才瓦加的苗民咸凜凜然不敢復萌異
志即附近滾塘之高麻等十八寨並遠隔滾塘之
黨牛加耳等十九寨俱繹絡赴營繳械願入版圖

七月十一日班師回古州由是上下兩江乃克大
定當清理上江時總督即有會勘黔粵疆界分地
鑿江開道之檄迨車寨滾宗等寨次第平定遂檄
按察司張鉞及文英紹周嘉賓通勘上下兩江上
自三角壘至三硎下自諸葛營至溶洞濬淺灘辟
險磧伐巨林鑿怪石舟楫上下郵遞往來無有阻
礙乃建城設鎮於諸葛營其餘來牛定旦高舊打
畧八開拉攬革赧柳疊龍寨丙妹各要地或協或

營或汎碁布星羅聲勢聯絡並隸黎平府

十年九月逆苗圍台拱至十一月官兵擊破之圍
乃解台拱即九股苗相傳漢武鄉侯南征戮其種
殆盡餘九人滋蔓蕃衍分而為九因名九股近丹
江者曰上九股近施秉者曰下九股寨密人稠土
饒性悍明季屢征不克

本朝定鼎初猶不免竊發康熙辛酉大師整旅黔疆
乃罔敢恣肆然弱肉強食自相讐言殺累世不悛雍

正四年噶覺番隴等寨夜出施秉刼琵琶洞石口
溪等處發鎮遠協兵剿之六年總督鄂爾泰清理
苗疆越明年丹江難講以次底定遂檄委鎮遠協
副將張禹謨知府方顯領兵開九股抵台拱宣揚
朝廷威德戒諭勿相侵凌繳亮械為良民是時羣苗為
兵威所懾皆俯首聽命於是清戶口編里甲版圖
登之天府此亘古所未有也第苗既亮狡未經大
創慮有反側議於台拱建城設兵以鎮撫之且上

為丹江聲援下與清江犄角而施秉鎮遠之藩籬
以固十年秋七月總督高其倬巡撫元展成會檄
按察使方顯董其事貳以貴東道黃世文檄清江
總兵趙文英領兵二千五百偕往定廣副將曾長
治佐之八月由施秉稿貢進次排畧各分兵防守
旋至台拱經畫既定工方興時秋禾遍野苗偽為
恭順然日夜刈獲不少息及農工甫畢城築數板
而諸苗叛初歐家墨引羊翁市界桃賴各寨倡議

曰官兵定居於此如我輩何盍驅之城工成將無
及諸苗謂衆寡不敵墨引寨苗曰吾將東連高坡
南結丹江多傭老虎漢必能取勝老虎漢者苗之
敢死士也遂傳遮木刻剝牛誓衆上九股三十寨
下九股四十二寨高坡三十餘寨皆附焉惟在濃
台拱稿貢三寨不從九月初六日夜各寨苗俱集
殺通事郭英歐玉勝等及商民數十人凌晨犯大
營外委張壁戰歿文英攻羊翁寨把總劉鳳林戰

歿急檄調援兵並檄稿貢之兵進保排畧時排畧
被困兵不火食者三日長治領兵五百往救適鎮
遠援兵亦至大破賊火其寨拔營歸台拱苗阻截
歸路守備高本陽死之排畧為台拱咽喉相去十
五里防守兵僅二百人苗攻圍三日不能破使圍
解後並以長治所領兵與大營相犄角刁斗相聞
糧運無阻得勝算矣撤兵歸營苗得據險孤軍坐
困外援不通此則主兵者之失計也初十日報抵

省城巡撫元展成飛檄各路兵赴援撫標遊擊馬
似龍先往平越營遊擊羅資袞督軍糧輜重隨之
將抵排畧伏賊突起官兵潰資袞戰歿似龍退駐
稿貢台拱發兵接應把總王朝傑死之是時黔西
遊擊馬騏提標遊擊王友文遵義遊擊吳朝貴先
後率兵至以持議不合遲疑逗遛巡撫元展成攝
提督印嚴檄四將赴援而賊堅守大關不能進又
委大定副將楊馥為總統星馳解圍未至文英攻

市界寨僅焚苗屋數間千總蘇成鳳把總徐三錫唐起鳳等戰死方逆苗之圍營也軍糧僅足支二十日文武官兵吸粥待援至是糧盡人心惶惶方顯曰初入九股時張禹謨欲屠台拱在濃余力阻得免二寨感不殺恩誓不反曷與謀之遂召二寨苗議米薪之價升米銀三錢有奇束薪銀一錢牛羊價數倍二寨欣然未幾賊知以糧濟我軍誓先滅二寨二寨懼不敢以米薪至十月九日楊馥至

見大關山高路險賊壘石以守曰此可以夾攻破也十二日令馬騏王友文從旁抄出賊營後自領兵前進士卒有懼色馥曰孤軍忍饑待援吾若後誰肯當先者遂舍騎抽刀徒步登山嶺天未曙賊睡卧中聞官兵突至驚愕四散馥殺傷無數追逐至壘石下賊伏草中發銃中馥左肋馥猶揮刀前進不數步仆衆兵奔潰馬騏等不敢進依山為營為賊所困凡三日水絕士卒饑渴棄軍械從間道

歸賊盡收之勢愈猖獗遂由稿貢出苗鼻嶺景河
一帶刼掠十八日犯下秉督糧知府滕文炯甘士
琇率兵渡河擊敗之生擒六人又於草中擒獲二
十餘人俱梟示河干自是平兆景洞諸苗始有懼
心方楊馥陣亡之日逆苗被馥逐殺負尸而歸者
踵相接在濃台拱乃復以米薪濟我軍是月署提
督左江鎮總兵霍昇履任即兼程赴援與黔西協
副將康世顯撫標叅將馮茂先後至十一月朔苗

賊由偏寨平閔渡江犯舊施秉官兵雖擊退而賊
勢愈張遠近諸苗皆搖惑觀望台拱在濃又不敢
以米薪至烏孟番招諸苗夜築土牆阻我兵後山
樵汲文英屢攻不克千總黃招賢戰歿我軍於營
中掘草根而炊文武官兵人日食米不及二合幾
不能支欲移營就糧方顯文英曰國家新疆尺寸
不可失吾輩當以死守知府劉洵同知宋厚皆持
堅守議適巡撫元展成檄至諭以援兵即日大集

慎勿移營衆志始定十一月十二日康世顯馮茂
等自下秉達干翁連營三十里方顯知援兵將合
與文英密計遣千總李勲夜四更領兵繞出後山
直逼賊營文英長治攻其前賊懼棄營遁隨破井
底烏孟二寨獲米穀有差十五日大營圍解閱二
日凱里都司侯弘道之兵亦至附近墨引歐家市
界桃繞桃賴各苗俱遠遁文英發兵火其寨又攻
南世桐木各寨殺賊十餘級獲米穀牛羊十二月

提督哈元生入

覲回奉

命進剿仍留左江鎮霍昇總統諸軍先是奉

上諭九股頑苗向未攝以兵威是以未能革心革面今
既敢行悖逆若不痛加懲創使之畏服非一勞永
逸之計


命調湖南兵二千廣西兵一千八百赴貴州會剿至是
湖南副將毋椿齡何勉廣西副將王無黨先後俱

集元生偵知賊潛匿高坡欲分兵五路同進會大雪乃止

十一年三月提督哈元生征高坡苗平之正月八日廣西遊擊許應虎由清江攻克烏溜殺賊數十生擒十餘人台拱獲奸細訊知賊匿山中康世顯發兵剿之擒苗十三人守備蔣秉忠戰歿元生乃發兵進剿高坡世顯由中路進椿齡馬騏等佐之叅將紀龍由右路進友文等佐之霍昇總統三路

由清江前往策應大兵既集交撤交工南弓交上
世登各寨皆先後投順而烏羅南山烏茫黨道番
牌獨結連九股拒敵霍昇等破之三月十二日元
生移駐台拱咨霍昇會剿番招番招者高坡苗寨
也其旁曰陽遼曰交汪曰烏脚交曰烏脚南凡數
千人與九股賊築土城於蓮花壘高二里許廣倍
之四面皆深箐聚積米穀牛羊可支數年推其渠
白黨為主併力死守我兵屢攻之不克二十五日

元生至番招二十八日親自臨陣分兵六路進攻賊不能支遂破其壘斬獲無算番招既破搜勦各箐日獲百餘人高坡平九股各苗皆面縛赴營投誠五月二十五日班師建城設官隸鎮遠府



貴州通志卷二十四

欽定四庫全書

史部

貴州通志卷二十五

詳校官監察御史

臣徐如澍

刑部郎中

臣

許兆椿覆勘

總校官編修

臣

倉聖脉

校對官庶吉士

臣

潘庭筠

謄錄監生

臣

周元梓

欽定四庫全書

貴州通志卷二十五

武備

苗疆師旅始末

雍正十三年二月賊苗包利紅銀等聚衆為亂犯
古州王嶺汎城總兵韓勲遣遊擊唐開中向之榮
禦之斬首十餘級賊遁官兵追至樂鄉韓勲飛咨
總督巡撫提督遂以賊狀奏

聞三月賊苗謀攻清江協城署副將曾長治攝清江通
判事都勻府知府宋厚告急提督哈元生檄發官
兵以遵義協副將宋朝相統領赴援朝相未至賊
苗又聚衆數千圍攻台拱之番招汎總兵卜萬年
遣遊擊邱中瑞張國秀擊退之賊遂聚集雞擺尾
梗塞清江台拱大路萬年令遊擊姚宅中邱中瑞
各帶所部兵由雞擺尾進援清江兵至交汪弗能
前營於蓮花壘越一日朝相統兵至賊斷去路亦

登蓮花臺與宅中等軍合賊乃乘勢圍臺元生萬
年持令趣赴清江不應四月初九日賊苗燒劫鎮
遠府屬印水司二十餘寨人民被殺廬舍灰燼府
城舊無城郭勢甚危迫貴東道黃世文鎮遠縣知
縣蔡時豫練集鄉勇多方捍禦請救兵未至賊苗
已犯近城之老虎頭卜萬年遣守備常富領兵三
百禦之賊乃走圍勝秉攻之三日縣丞陽造極千
總牛亮告急萬年遣守備陳文華往援初十日賊

苗圍清江並北岸之柳羅營副將曾長治等發兵分禦之二十日柳羅乏糧長治令守備王承良齎糧至黃茅嶺與賊力戰柳羅營出兵夾擊賊退糧始達營二十一日賊苗陷凱里清平縣典史邵煥麟死之駐防把總曹萬國舉家遇害僅以身免居民千餘家盡遭屠戮時卜萬年聞凱里之變飛檄促宋朝相等撤回朝相乃乘夜撤兵千總郭占乾及兵丁數人被殺並失軍裝二十三日賊苗陷重

安江驛燒劫沿江居民越三日陷黃平州知州羅
鳴序死之先是賊未至時城內僅兵三十人適平
伐營外委把總黃進忠帶兵五十人赴偏橋過州
鳴序留與本城千總金升共守賊大至鳴序知不
可為擇地瘞庫銀若干令家人齎印間道赴省繳
藩庫與幕友陳憲同時縊死進忠亦戰歿金升手
刃妻子潰圍而走居民未避去者俱被害二十八
日賊苗燒劫岩門新司倉糧次日燒劫舊司駐防

把總梁壁戰死岩門司土官何其仁重安司土官
張純全朗城司土吏目馮秉文等相攜赴水死其
仁純全俱舉家遇害自苗變以來本省官兵徵調
殆盡逆氛四起奔救不遑驛路阻塞省城戒嚴提
督哈元生乃親出督師僅率兵三百餘人次於楊
老總督尹繼善急發滇兵檄廣羅協副將周儀奇
兵營叅將哈尚德提標遊擊張接天等星馳赴援
並飛咨楚粵四川發兵協剿閏四月朔四日賊苗

攻黃平舊州城吏目陳彌祐遁去把總楊心鳳李
榮拒敵被傷守備陳國斌領兵走上塘避之城遂
陷初七日賊苗陷清平縣城駐防把總陳兆先巷
戰被傷知縣邱中胆外委把總張秉義俱逃時大
定協副將紀龍駐城外帶兵入城逐賊苗始退城
燬十八日賊苗陷餘慶縣城先是知縣朱若琦告
急哈元生遣把總王兆元房育昆帶兵百人應之
賊至居民奔避江外若琦兆元等不能堵禦遂同

難民馳赴江外避之二十一日賊苗誘陷台拱之排咱汛殺提標守備高謀本汛官兵五百名得脫者止九十餘人二十四日賊苗犯八寨協城官兵併力禦之是時廣西左江鎮總兵王無黨率兵至古州聞八寨有警遂領兵進援賊始退五月朔有二日餘慶縣生員毛鄴首倡鄉勇數百人與石阡府經歷鄭嘉忠鄉約石中印等約把總王兆元房育昆克復餘慶縣城初三日賊苗誘陷小丹江汛

千總劉文魁及兵丁二百人並其家屬盡被屠戮
賊苗屢犯施秉縣城知縣蔡謹激勵士民親率鄉
勇晝夜防禦卜萬年發兵來援圍始解居民避入
山谷者為賊四出搜殺備極慘毒是時新疆逆苗
多掠得重貲回巢穴雖得城棄弗守內地附逆之
苗聞滇兵至俱蟻聚重安江以塞要衝哈元生乃
檄紀龍哈尚德等開通大路於是紀龍敗賊於大
風洞遣守備陳思儀救獲難民四百餘口哈尚德

屢敗賊於打鐵關乾塘月河等處黃平新舊兩城
以次克復又與周儀紀龍等合兵攻重安江賊苗
敗潰遂復重安驛時

世宗憲皇帝命哈元生為揚威將軍元生聞

命遂自楊老移駐清平遣紀龍周儀會兵於二十六日收
復凱里二十七日逆苗陷青溪縣訓導譚德溥遇
害先是鎮遠青溪水陸梗塞貴東道黃世文告急
於楚省湖南巡撫鍾保提督董芳遣提標遊擊韋

國英洞庭協副將魏國泰撫標叅將謝龍等領兵
先後至黔界分駐鎮遠大路一帶總督邁柱又委
襄陽鎮總兵焦應林率兵二千來援哈元生檄止
之令駐沅州不得進而賊勢蔓延漸逼青溪於是
思州府知府甘士琇知縣鍾兆熊飛請鎮筸鎮沅
州協各發兵一百名來縣防守是日賊大至楚省
千總張通外委把總楊文富棄城走兆熊乃率同
教諭劉景旦典史蔣鴻把總戴世爵古正文并兵

民人等齊上城內北山拒守德溥衰老獨遇害賊
犯北山兆熊等以死拒之兵民皆奮木石俱下賊
乃退六月八寨協副將馮茂剿牙門九門等處苗
懼乞降茂詐許之初四日假稱起營派令運送軍
裝至卡烏河殺六百餘人又誘縛苗頭三十五人
解赴元生軍營斬訖以故諸苗怨忿叛志愈堅不
可招撫矣元生自抵清平令叅將哈尙德同遊擊
崔傑由重安江剿沿江賊寨令黔西協副將康世

顯同遊擊張接天由凱里剿江外賊寨有螃螬寨者形勢最險固尚德會世顯夾剿之獲賊首老缺老典並逆屬數百餘口是月兩粵官兵先後至古州者八千人分調四千餘衆各處赴援韓勲與高州鎮總兵譚行義廣東督標副將王濤共商行義駐古州彈壓勲與濤率兵進剿二十八日勲濤等駐營嶺賈搗燬高婆高表色同九董等寨七月

世宗憲皇帝命湖廣提督董芳為揚威副將軍協剿逆苗

命刑部尚書張照總理兵馬錢糧賑恤事務以都察院左副都御史德希壽副之行次沅州駐劄賊苗自陷排咱後即圍稿貢汎駐防守備李夢梅告急卜萬年遣遊擊張國秀尹承宗擊之承宗率兵將抵汎半里許賊苗突出把總王德成及兵丁陣亡十餘人萬年又親往至化夷臺失利而還遂飛咨告急元生遣康世顯進援本月初七日至天桃箐逆苗阻路官兵接戰外委桑之元及兵丁陣亡者十

餘人世顯乃秉夜取徑繞稿貢後山而出十二日
復與賊力戰威寧都司張文秀雲南守備林士昌
把總蘇奎千總李天秩等俱戰死官兵傷亡者數
十餘人至二十日世顯督兵復戰賊乃敗餉道始
通是月古州總兵韓勲等移營高表令叅將王鼎
遊擊楊剛唐開中侯宏道等剿色同等寨獲賊女
將偶央偶你叅將王璋等剿高婆等寨獲賊首強
銀汪尙八月總理張照德希壽副將軍董芳移駐

鎮遠十二日董芳自鎮遠進至八弓維時叅將哈
尚德遊擊張接天董國棟姚宅中等敗賊於施秉
始復新城斬首六十餘級獲男婦三十餘口貴州
副將柳定國廣東副將馬成林湖廣副將李椅等
破賊於清江柳羅圍解清江自三月被困無一人
一騎之助者已逾半載哈元生飭定國等進剿於
是由梁上至柳羅奪賊關者五破賊城者一摧賊
營寨者六斬馘六十有七曾長治見援兵至發兵

夾擊賊乃退散清江始通隨又乘霧擊柳受寨斬
首三十餘級哈元生令其乘勝進攻台革時董芳
檄調成林椅赴八弓不得前初總兵王無黨率兵
進剿八寨將軍哈元生以八寨勢緩鎮遠勢急調
駐勝秉及副將軍入黔凡楚粵官兵俱隸麾下遂
調無黨移駐八弓令率同副將魏國泰叅將鄭元
文遊擊楊通仁韋國英等剿寨頭岑松等處克之
韓勲令叅將王鼎遊擊楊剛唐開中侯宏道等剿

八昧烏公等寨獲賊首混唐女將包假斬馘三十
餘級獲賊屬百數十人九月元生令四川副將壽
長雲南叅將哈尚德開通丹江先是四月內賊苗
屢犯丹江叅將馬世祿通判許錫昌告急以路阻
不能達五月哈元生始遣副將周儀紀龍往援行
抵開懷遇賊外委謝廷瓚陣亡六月朔四日周儀
紀龍抵雞講糧運阻絕二十二日千總曹在朝賁
糧赴丹江遇賊陣亡二十八日儀等與賊戰於平

寨河邊守備武英千總孫榮把總向碩賓湯紹緒
周連功加呂先賢陳英外委朱一鳳土目王廷紀
俱戰死兵丁傷亡者二百餘人哈元生聞警調遊
擊王先守備高宗瑾張鵬翥駐黃土壘都司陳思
儀駐平寨又調副將馮茂周儀遊擊向之榮王欽
協剿七月雲南遊擊胡大勇帶兵抵清平元生即
令赴援十八日官兵啓行賊乘風雨驟至阻截糧
運把總蔣忠外委馬國奇及官兵陣亡四十餘人

次日涉河賊衆突出官兵力戰千總王之賢張麗
天張忠萬金把總劉得玉王諭盧開元外委李士
相陳德宏土弁沙盡漢等俱陣亡官兵死傷百二
十餘人糧運始抵難講二十六日丹江遣兵接糧
又為賊阻殺把總李雲蒼及官兵三十餘人至八
月丹江乏食益困兵丁多餓斃者世祿錫昌問道
告急適總督尹繼善調川兵二千到黔哈元生即
令副將壽長率其兵與哈尚德星援十九日破老

鴨寨連擊賊營遂入丹江城糧運始通二十四日
高州鎮總兵譚行義剿滾縱克之是月將軍哈元
生移駐凱里副將軍董芳移駐六甫十月朔副將
壽長叅將哈尚德遊擊馬踰隆辛永禕等與賊戰
於烏耶關連破四城又破烏溜等寨斬首七十餘
級獲男婦五十餘口十六日副將軍董芳遣總兵
王無黨副將李椅叅將鄭元文謝瓏遊擊楊通仁
王自明余忠曾唯等剿六甫燬其寨斬馘百六十

三級絞枉柳傍者磨等寨乞降獲賊首火利總兵
韓勲令叅將王鼎遊擊楊剛唐開中侯宏道等破
賊於寨林寨翁斬馘七十餘級總兵譚行義遣遊
擊王璋王臣張守鳳等剿擺列及火燒仰黨喬扣
等寨獲賊首老溫等八寨山苗犯八寨城又圍攻
得祿汎同知魯朝聘遊擊陳綸告警元生調回遊
擊李子昌都司魏子鳳守備余先魁等分剿之是
月

上命湖廣總督張廣泗總理兵馬錢糧賑恤事務撤張
照回京旋

命廣泗為經畧楊威將軍以下俱受節制德希壽亦撤
回十一月經畧張廣泗抵鎮遠以賊首聚集九股
清江之間必三路進攻乃可以潰其腹心散其黨
羽於是分兵三路遣四川督標副將壽長貴州定
廣協副將曾長治雲南奇兵營叅將哈尚德等剿
上九股等寨廣西左江鎮總兵王無黨貴州黔西

協副將康世顯等剿下九股等寨令署台拱鎮總
兵紀龍為策應以清江地廣賊衆廣泗率副將軍
董芳親駐其城遣湖北襄陽鎮總兵焦應林廣東
惠州協副將馬成林湖廣九谿協副將李椅貴州
清江協副將柳定國等率兵進剿面授諸將方畧
尅期並發十二月經畧張廣泗所遣官兵三路皆
捷月朔壽長曾長治哈尚德等率兵抵開懷賊苗
築城砌卡約數十處防拒甚嚴乃分兵進擊尚德

率遊擊趙之祿姚宅中等破高寨壽長率遊擊馬
踰隆辛永禕等破囊蒿寨長治率遊擊李正國都
司米世泰等破長坡寨惟掛丁空稗最為險固為
賊首枉汪等巢穴左右盤踞大小二十餘寨諸將
先剪其旁十許寨至初四日始並力擊之賊以死
拒守備周鳳祥率兵由後山呼噪而進賊始驚潰
餘黨皆降十八日獲賊首曾柳二十日馬踰隆等
克囊高交高鉛廠洞下等寨二十三四等日擒賊

首枉汪枉保計斬首四百餘級生擒苗男婦大小
百八十餘口獲大炮鳥鎗及兵械牲畜等項無黨
紀龍世顯等前月率兵擊台雄寨廣西遊擊曾唯
及千總熊祿把總史能方楊萬玉蔣可正曹廷棟
等俱陣亡本月初四日無黨又分兵進剿有功加
李林王奇兵目陳應富陸洪禮等皆敢死士也先
登入其土城守備董正坤揮兵擁上奪賊二營守
備郭乾奪賊一營遊擊張接天奪賊二營遊擊羅

王秀奪賊一營賊敗初十日復發兵奮擊無黨紀
龍世顯親臨督戰奪賊十三營賊乃奔潰盡破其
寨計斬首十有三級獲鎗械穀米等項馬成林柳
定國等率兵剽難擺尾賊苗築城於三關口成林
偵其城中僅百餘人潛兵襲之連奪六城賊遁少
頃賊數千奔至成林與都司王之臣分左右擊之
焦應林遣叅將溫朝宰率兵先至柳定國率兵繼
至會兵奮擊賊敗入箐應林等密議以欲搗難擺

尾巨惡必先除雞右一帶賊黨以孤其勢十一日
乃督兵至歹濃山燬其營壘二十餘所破雞右上
中下數寨十三日復分左右翼進擊雞擺尾賊不
能支棄寨而逃定國復取烏溜李椅取雞呼黨賊
俱潰敗入箐前後斬首百八十餘級生擒男婦百
七十餘口獲鎗械牲畜等項是月副將軍董芳被
逮赴京

乾隆元年正月經畧張廣泗自清江巡視雞擺尾

台雄空稗一帶軍情令總兵焦應林駐雞擺尾副
將壽長駐空稗遊擊尹承宗駐台雄彈壓遂移節
駐凱里調度諸將遣副將馬成林李椅柳定國等
為一路以都勻府知府宋厚為監紀總兵王無黨
副將康世顯為一路以鎮遠府知府劉洵為監紀
兩路聲援會剿高坡一帶苗寨遣副將曾長治剿
大丹江之烏堯防里等寨為左路守備吳仕佐等
剿小丹江之烏疊留神等寨為右路叅將哈尚德

馬世祿等剿大丹江之桃繞雞勇等寨為中路三路並進會剿丹江又飛檄遊擊李子昌王先等直攻山苗巢穴使其彼此不及救應時續調之川兵二千名川北鎮總兵王廷詔統領前來廣泗即令其星赴丹江會合尚德兵協剿二月諸路官兵皆捷哈尚德率守備譚盛元等進攻桃繞克其上中下三寨並雞勇皆騷等寨馬世祿與遊擊姚宅中等進攻囊蕩黃毛克之並剿洗文霜等寨吳仕佐

進攻蜂塘寨克之並焚剽東仰枯桶等寨守備戴
虎進攻烏稍烏疊等寨曾長治攻克烏堯防里等
寨進與尚德兵合有馬家雞勇二堡對峙河孺尚
德選精壯八十人乘夜赴馬家堡賊築城於隘非
可力取乃放火箭燒死三百餘人乘勢遂破雞勇
堡王建詔率兵前進分遣叅將李文秀克抱得寨
遊擊孔文彬克烏溜寨亦與尚德兵合廣泗飭廷
詔率兵駐丹江尚德赴高坡會清江台拱兩路官

兵於是尚德與馬世祿等又進搃趙革排老等十餘寨餘賊逃竄山箐旋剿蓮花撈烏撈密等寨克之又攻趙坳支舟等寨諸苗皆乞降王無黨康世顯劉沛等克交上寨斬獲甚多馬成林李椅柳定國宋厚等剿烏羅反牌二寨圍擊之賊棄寨奔烏羅關楚粵兵分路夾攻賊奔入深溝遊擊余忠守備周岐山等伏兵齊起殺賊溝水為赤無黨世顯等進攻交上寨馬成林等合兵會剿共克其四寨

並克汪江節過趙甲南豆等寨無黨等遂進剿南
工其寨分踞大河兩岸山形壁立地險苗稠乃與
李椅等定議率兵攀援而上奮力夾攻之遂克其
寨次日又攻歹賴一鼓而克無黨世顯成林定國
等克烏西烏熙二寨遂進攻交包奪賊三城並其
一營賊乃竄入雞花官兵直抵雞花後山劄營搗
燬昂焉昂速昂倩等寨共斬馘百數十級生擒男
婦數十口八寨遊擊李子昌前曾剿擺調方勝等

寨擒賊首阿扛父子經畧張廣泗飭令會遊擊王
先兵營於擺調復檄令副將曾長治攻克丹江之
後即進與子昌王先兵合以都勻府知府孫紹武
為監紀並飭上江協副將王耀祖率兵來會同剿
山苗於是王耀祖與守備姜諧五等克加支寨與
長治兵會攻喬港兩跨趙披擺保羊烏等寨並克
之譚行義克擺弔烏婁二寨韓勲克扣里洞里羊
弔等寨俱有斬獲三月經畧張廣泗調兵會剿牛

皮箐箐在新疆之中綿亘數百里不一其名丹江
雞講在其北古州上江在其南八寨九門在其西
南清江台拱在其東北地極深險逆苗恃為淵藪
賊首多竄匿其中是時清江台拱兩路官兵已至
雞花交包駐劄朗洞滾縱二路官兵已至羊色洞
里駐劄總兵王廷詔已進烏堯在舊駐劄叅將哈
尚德已橫過大箐直抵番祥駐劄副將曾長治已
抵加照副將王耀祖已移營柳排駐劄星羅砦布

八面圍攻廣泗又飭總兵焦應林副將壽長等於
箐外堵禦以防竄逸四月牛皮大箐平獲賊首包
利枉利等並其家屬凡妄稱名號者悉就擒獲總
兵王廷詔派遣叅將李文秀馬世祿等會副將曾
長治分左右二路剿交蜡喬落等箐其皆坐一寨
為賊居停且糴米資賊長治文秀合兵剿之康世
顯柳定國等搜剿交別排蜡等箐進會哈尚德兵
剿交那寨又圍交烏交歪二寨克之回至雞花軍

營共斬馘三十餘級獲男婦二百餘口副將周儀
遊擊孔文彬等搜烏堯箐至烏東與哈尚德會共
斬馘九十四級擒男婦四百七十餘口總兵韓勲
遣叅將王鼎遊擊唐開中楊剛等搜羊色等箐斬
馘百六十餘級生擒百八十餘口又剿旁洞等寨
斬馘九十餘級生擒男婦百餘口總兵譚行義遣
遊擊王璋等搜洞里箐斬馘三十五級獲男婦三
十餘名五月牛皮箐搜剿已竣經畧張廣泗移駐

清江指揮諸軍是時揚威將軍哈元生被逮赴京
上以左江鎮總兵王無黨署貴州提督廣泗令無黨駐
營岩門督理凱里黃平施秉台拱一帶軍務以新
陞貴西道劉泐協同辦理飭雲南永北鎮總兵劉
永貴督理清江下河南北兩岸軍務以新陞貴東
道宋厚協同辦理其各鎮協營俱飭令分路剿捕
又檄都勻府知府孫紹武黎平府知府滕文炯清
江通判蔡時豫永寧州知州王遂清平縣知縣劉

樵施秉縣知縣蔡謹普定縣知縣陽造極等隨軍
協辦凡有擒獲合同研訊殲寇宥脅期在區別頑
良無枉無縱六月丹江平總兵王廷詔遣遊擊楊
澤厚馮志達都司張懷元等於初八日率兵發自
高坡營於趙黎囊蕩適中之地沿箐窮搜斬賊四
級擒苗婦二口惟桃繞烏疊等寨為丹江渠克餘
黨猶未盡殄廷詔乃遣叅將馬世祿遊擊楊澤厚
等率兵擊之斬馘二百餘級俘男婦三百一十餘

口七月古州平總兵韓勲遣遊擊唐開中楊剛侯
宏道等克月姑元賽八輸盤噶高定翁脚唐流九
衣等寨又克寨牙寨戶棉花新寨高苗等寨共斬
馘八百二十餘級擒男婦子女六百九十餘口黎
平營遊擊趙國儀克培耶斬牙南孟培牛等寨共
斬馘六百六十餘級擒男婦四百六十餘口總兵
譚行義遣遊擊張守鳳等克擺列寨又親督遊擊
王臣等剽火燒仰黨喬扣等三寨共斬馘百六十

餘級擒婦女六十餘口八月台拱施秉凱里黃平
八寨等處悉平提督王無黨遣叅將張接天等剿
革東都司馬國祚等剿苗江守備郭乾剿方家寨
祁文魁剿吳家寨令副將康世顯督兵搗洗斬馘
七十餘級擒男婦三十餘口副將姜煊曾叅將陳
有功等剿五岔克之斬首百九十餘級擒男婦七
十餘口世顯令都司馬國祚等剿捕稿武箐斬馘
八十級俘男婦八十餘口進攻岑邦又斬馘二十

餘級遊擊尹承宗剿凱里之台盤打革弄賽趙舍
世柳等寨斬馘百餘級擒男婦五百六十餘口世
顯剿黃平之革夷等寨擒男婦六十餘口進剿望
虎稿貢等寨斬馘二十餘級生擒三十餘口無黨
檄遊擊董國棟等剿白壩龍塘二寨斬馘四十餘
級擒男婦百七十餘口又檄副將姜煊曾等剿八
梗舊舟二寨斬馘二百六十餘級擒男婦二百餘
口又進剿陽調井干等寨斬馘亦百餘級副將曾

長治剿番仰番扛番甕羊堯擺卓烏號令山箐兵
威所到勢如破竹旋師八寨又剿牙門楊牌楊烏
等寨共斬馘三百五十餘級擒男婦子女共三百
九十餘口九月清江下河南北兩岸苗寨悉平副
將馬成林哈尚德柳定國等剿九甫寨與賊鏖戰
自辰至未賊乃大敗遂沿江分剿成林率都司王
之臣等擊繞號寨賊不敢敵乘船欲逃官兵擊沉
二船賊盡溺死定國與叅將謝瓏擊培鷺趙賴二

寨克之尚德率兵臨反受其寨踞懸岩之上背統大河賊據險對敵尚德以鎗炮誘賊於前與之相持陰使三百人渡河緣崖繞攻其後賊首尾受敵遂破之總兵劉永貴駐兵梁上遣遊擊趙國儀剿培鳩寨國儀設伏要隘率重兵直壓賊巢悉駢戮之柳旁汪刀之苗多有匿箐者永貴又遣叅將謝龍遊擊趙國儀楊通仁趙璧等分路搜剿龍國儀率兵入箐頗多斬殺通仁入箐有男婦數百人俯

伏乞命官兵往殺數人苗惟哀懇不去通仁不忍
加戮苗乃下岩就縛趙壁入箐亦有男婦號呼乞
命壁亦不加誅令自縛赴營永貴與貴東道宋厚
訊令供出克頑斬之其餘五百口悉准安插副將
哈尚德遊擊趙國儀等攻克柳受培鳩二寨叅將
謝瓏遊擊趙壁等攻克九寨柳寨柳定國馬成林
等攻克黨領寨遊擊趙國儀楊通仁等攻克高邱
寨副將李椅與遊擊余忠等攻克九丟歹旦二寨

馬成林與都司王之臣等攻克柳拉寨俱大有斬
獲副將姜端曾叅將溫朝宰等合兵擊抱金絞狂
二寨官兵圍抱金其男婦號泣乞命端曾令自擒
首克來獻諸苗乃縛出七十人並獻其家屬百二
十口次日擊絞狂亦自獻首克十餘人又克台革
柳羅二寨斬馘二百餘級擒男婦三百九十餘口
十月經畧張廣泗乃由清江巡視諸軍遍歷古州
上江八寨丹江等處旋節凱里新疆內地軍務全

竣六省官兵以次凱旋捷

聞

上命廣泗總督貴州兼攝巡撫事務世襲三等輕車都尉廣泗以下叙功賜階有差

姑盧始末

乾隆三年三月頑苗阿沙等作亂總督張廣泗剿平之阿沙者定番州姑盧寨苗也其父老排恃其寨大族豪素行不法隣寨屢受其害莫敢與爭乾

隆二年二月老排牽捏細故率阿沙等往谷栗寨索詐漢民路經大樹寨見向登雲牧牛在野殺其人而奪之州牧負懷英驗報弋獲老排收禁並捕其克黨伊子阿沙阿王侄阿些阿務等遂聚族拒捕久之知罪在不赦乃糾衆數百餘人於三年二月十九日赴雞場虜去漢民張具清陳士林楊君相三人為質以索伊父二十四日又燒甲浪店房虜去客民官勝萬殺傷謝安陳倫等劫貨而歸聲

言老排不出即犯城汎三月初二日果犯羨場塘
虜去州民曾發元箭傷兵丁榮起臣並客民數人
總督張廣泗提督王無黨檄令地方文武曉諭弗
聽因決議剿之飭委署大定協副將馬似龍率漢
土官兵千二百人由方番司進定廣協副將哈尙
德率兵九百人由明通關進提標遊擊董國棟率
兵六百人駐堵召公鵠二處堵禦遙為聲援又令
都勻協遊擊陳綸率兵七百餘人由牙舟進官兵

既集阿沙等聚於山頭與軍營對駐似龍尚德擊退之乘夜又犯陳綸營綸伏兵以俟賊遇伏驚潰綸出揮兵追之飛矢傷其胸二十五日定廣協外委吳洪業白納司土官周釗方番司土官方銃等用計誘擒阿沙其黨遂懈次日官兵搥燬老排所居下新寨阿沙所居石頭寨並附近之冗心花寨江西寨石板寨以次焚燬救被擄之漢民張具清陳士林曾發元官勝萬等而出逆苗逃竄入箐四

月初八日官兵抵箐搜捕餘黨擒三十一人次日
至公鵝大箐又擒男婦大小三十二人並獲弓箭
盔甲牛馬等物衆苗悔懼叩首咸願獻克贖罪於
是各寨苗頭李老么等縛老排諸子姪阿王阿猛
阿惹阿虛等來獻阿密等又擒大石板寨逆苗阿
噶阿擦阿喳阿們阿固阿左阿先等男婦十六人
來獻十六日大定協千總劉平漢定廣協千總黃
亮等擒大石板寨首逆阿粟阿故並逆苗阿蒙等

下羊腸寨首逆阿着阿唐阿們等共十人十九日
又搜獲小石板寨逆苗老立猛並婦女七人二十
二日安順營守備解大壯搜獲逆苗阿們等並男
婦三十餘人俱送按察司訊擬正法計出師旬餘
日事竣凱旋先是總督張廣泗籌畫通省營制原
題請於高寨地方駐兵彈壓事未及行忽有是役
乃距姑盧十五里改築城於大塘撥本協官兵四
百名並請設州判一員分駐其地以資治理焉

貴州通志卷二十五